



Lescha d'agricultura

Revisiun parziala

M E S S A D I

dalla suprastanza communal a al cussegl da vischnaunca

Preziau signur president
Preziadas signuras cusseglieras
Preziai signurs cussegliers

La lescha d'agricultura actuala datescha digl onn 2008. Damai che quella lescha sco era ils contracts d'affittaziun corrispundan buca pli allas prentensiuns dad oz, ha la suprastanza communal eligiu ils 5 da fevrer 2018 ina cumissiun per reveder parzialmein la lescha d'agricultura (800).

La cumissiun secumpona ord representants dil cussegl da vischnaunca, dil gerau dil departament, dall'uniun purila, digl uffeci da baghegiar, digl uffeci forestal, digl uffeci da catscha e pesca, dallas Pendicularas Mustér e dall'administraziun communal:

President: Wendelin Jacomet, *cusseglier da vischnaunca*

Commembers: Clemens Berther, *gerau dil departament d'agricultura*

Armin Manetsch, *president uniun purila e president dil cussegl da vischnaunca*

Ervin Maissen, *menader infrastruttura*

Simon Cathomen, *uffeci forestal*

Thomas Durschei, *uffeci da catscha e pesca*

Marco Schmed, *Pendicularas Mustér*

Ursina Murer-Fatzer, *actura*

La cumissiun ha salvau quater sedutas. Signur Töni Gujan, cusseglader puril dil Plantahof ei vegnius envidaus alla seduta dils 27 da mars 2018. Competentamein ha el rispundiu las damondas dalla cumissiun. Per ulteriur sclariment ha la cumissiun giu la pusseivladad da contactar signur Pieder Vincenz digl uffeci d'agricultura e geoinformaziun, Cuera.

Ponderaziuns

La cumissiun ha tschentau las suandontas ponderaziuns e damondas:

- a) Taxaziun per la gudida da pastiras per **ha ni a**? Elavuraziun dils contracts d'affittaziun per romontsch sursilvan.
- b) Definiziun dils cunfins dalla cultivaziun.
- c) Reglar ils cunfins ed il ruaus dils animals.
- d) Reglar la lavur cumina dallas alps - indemnizaziun ad ura ni pauschala?
- e) Dretg dil gudiment dallas alps – basegna ei statuts?

Per levgiar la lavur dall'administraziun communal ei la cumissiun stada dil meini ch'ei seigi d'aventatg da crear in regulativ da taxas per la lescha d'agricultura. Entochen oz ei in tal regulativ buc avon maun.

Per il contract d'affittaziun ha la cumissiun surpriu la versiun tudestga ch'igl uffeci d'agricultura e geoinformaziun ha mess a disposiziun sin sia pagina d'internet. La cumissiun ha translatau il contract d'affittaziun el lungatg uffical dalla vischnaunca romontsch sursilvan.

Plinavon ha la cumissiun giu il giavisch da saver evaluar ils artechels necessaris dalla lescha davart ils dis da ruaus publics (840).

Ils 20 da mars 2018 ha la suprastanza communal decidu che la cumissiun dueigi inoltrar propostas pils artechels necessaris dalla lescha davart ils dis da ruaus publics (840). Quei giavisch ei succedius entras la cumissiun en in rapport per mauns dalla suprastanza communal.

La suprastanza communal preveda ina revisiun dalla lescha davart ils dis da ruaus publics resp. ina lescha nova da polizia, tenor la quala las damondas en connex cul ruaus public duein vegnir stipuladas. Ella sessiun digl uost 2018 tracta il Cussegl grond la lescha da polizia cantunala. A basa dalla legislaziun cantunala sa la vischnaunca relaschar ina lescha communal da polizia.

Proposta

Sin fundament dil rapport dalla cumissiun dalla lescha d'agricultura

propòna

la suprastanza communal al cussegl da vischnaunca:

1. d'approbar la revisiun parziala dalla lescha d'agricultura;
2. da prender enconuschientscha dil regulativ da taxas per la lescha d'agricultura sco era dil niev contract d'affittaziun che vala per la gudida da pastira e per l'alpegiaziun;
3. sin fundament dallas midadas previdas ella lescha vegnan tut ils contracts da gudiments da pastira ch'ei avon maun visai, per aschia saver contrahar da niev cun ils affittaders;
4. da suttametter quei conclus al referendum facultativ tenor art. 21, lit. b dalla constituziun communal.

Suprastanza communal Disentis/Mustér
Il president:

Robert Cajacob

Il vicecanzlist:

Romeo Schmed

Disentis/Mustér, ils 23 da fenadur 2018

- Lescha d'agricultura (800)
- Revisiun dalla lescha d'agricultura: Sinopsa
- Niev regulativ da taxas per la lescha d'agricultura (802)
- Contract d'affittaziun